

東華三院文物館成立於本院百年大慶之辰，所以聚藏有關之史乘典章文獻者也。原夫東華善業萌自廣福義祠，閱今逾二甲子矣。歲紀緜邐，其制度典章代有更易，衣冠文物，久異昔時，然賢哲之徽猷及其傳統之精神脈絡猶可尋釋而得之，殆文物之功歟。昔陸機文賦曰：石韞玉而山輝，水懷珠而川媚。則三院文物館必因其珍藏而顯要可預卜也。前香港大學教授羅香林氏序東華三院百年史略嘗謂：東華三院史即香港之社會福利史與香港之義務教育史，亦即香港居民之醫療衛生史，稽諸文物館之所藏信非過譽也。癸酉之歲，吾人謬董院政，深體創業艱辛守成匪易，敢不同心同德，共赴事功。惟是一己之力，究屬有限，眾志成城，則威力無邊，深感仁漿義粟，既來自社會，使能加深各界對三院善業興作之認識，必大助彼此之聯繫，因興野老芹曝之念，而有開放文物館之議，於禮訪諏諮慎為整理。雕樑綉柱，悉以新之。籌備經年迺成。爰於中秋前二日，敦請 文康廣播司蘇耀祖 OBE 太平紳士親臨主持開放東華三院文物館開幕典禮。自今以後，四方君子於遊觀賞覽之餘，當有興感，為善最樂之意志，而思效其悲天憫人之願力。同寅等誠心祝之，謹泐片言是為記。

東華三院癸酉年董事局主席黃士心 副主席蕭麗君 呂博碩 呂禮章 吳彭年 張中弼

總理馮咏聰 洪王家琪 朱伯舜 鄧家雄 黃龍 王忠桐 梁楊麗玲
黃金富 施榮懷 楊永強 王兆基 馬鴻銘 周振基 鄭建平

一九九三年歲次癸酉年八月十三日